



22. februar 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit qarasaasiami inuinnaat naapittarfiini torersumik pissusilersornissaq pillugu:

Apeqqutit tallimat saqqummiunneqartut Kulturimut, Ilinniartitaanermut, Ilisimatusarnermut Ilageeqarnermullu Naalakkersuisup Facebookimi oqallittarfimmi "Politikkikkut oqalliffik - Politisk diskussionsforum" ilanngussaanut tunngapput (Kulturimut, Ilinniartitaanermut, Ilisimatusarnermut Ilageeqarnermullu Naalakkersuisup ilanngussaa apeqquteqarnermut tunngavilersuummi atuarneqarsinnaavoq):

- 1. Naalakkersuisut eqqortutut isiginerlugu Kulturimut, Ilinniartitaanermut, Ilisimatusarnermut Ilageeqarnermullu Naalakkersuisup aamma tusagassiutinut akisussaasup, taamaasillunilu aamma qarasaasiami inuinnaat naapittarfiinut, Facebookimi taamatut pissusilersornera?**
- 2. Naalakkersuisut isumaqatiginerlunga, Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoq atorfini pissutigalugu qarasaasiami inuinnaat oqallittarfiani kusanartumik pissusilersornissamat sallersaasariaqartoq aamma Naalakkersuisut isumaqarpat taamatut ilanngusaqarnermini maligassiusimasoq?**
- 3. Naalakkersuisut akuerisinnaanerlugu pissutsit taamaattut Naalakkersuisunut ilaasortamit Facebookimi saqqummiunneqarsinnaasut?**
- 4. Naalakkersuisut qanoq isumaqarfiaat, Naalakkersuisunut ilaasortap nikanarsaanera partiillu isummersuutaanik isumaanillu Facebookimi sangutitsiniarsarinera?**
- 5. Naalakkersuisut ajornartorsiutitut isiginerlugu, Kulturimut, Ilinniartitaanermut, Ilisimatusarnermut Ilageeqarnermullu Naalakkersuisup § 37 tunngavigalugu Inatsisartunut ilaasortap apeqqutaanut Facebookimi oqaaseqarnera nikanarsaaneralu, naatsorsuutigisariaqarmammi Naalakkersuisup taassumarpiaap apeqqut pineqartoq akiumaaraa?**
(Inatsisartunut ilaasortaq Randi Vestergaard Evaldsen, Demokraatit)

Tunngavilersuut:

Demokraatini akuerineqarsinnaanngitsutut isigaarput, Naalakkersuisunut ilaasortap nikanarsaanera piaaralunilu partiip allap isumaanik Facebookimi nassuiaanerlunnera - sakkortusaatitullu isigaarput uani pisumi pineqarmat § 37 naapertorlugu apeqqut nassiunneqarnikooreersoq, Naalakkersuisup pineqartup nammineerluni akisassaa.

Demokraatini isumaqarpugut Naalakkersuisunut ilaasorta immikkut akisussaaffeqartoq qarasaasiami



inuinnaat naapittarfiani maligassiuinissaminut taamaattumillu aamma kikkut tamarmik oqallittarfiini soorlu "Politikkikkut oqalliffik - Politisk diskussionsforum"-mi Naalakkersuisunut ilaasortat pissuserissaarnissaminut maligassiuisariartut.

Kulturimut, Ilinniartitaanermut, Ilisimatusarnermut Ilageeqarnermullu Naalakkersuisup ilanngussaa uani tamakkerlugu akineqarsinnaavoq:

"Kalaallisuinnaq oqaasillit ilinniarfinnut ammaanneqarnerunissaannik siunertaq Nivi'p ajuusaarutigaa.

Kalaallisuinnaq oqaasillit ilinniarsinnaanerannik periarfissinneqarnissaat Naalakkersuisooqatigiit isumaqatigiissutaanniippoq. Taamaamat kalaallisuinnaq oqaasillit ullumikkornit periarfissaqarnerunissaat anguniarlugu Naalakkersuisuni suliniuteqarpugut. Tamanna Ilinniarfinni assigiinngitsuni pitsaasumik misilittagaqarfioererpoq angusaqarfiulluarterlunilu. Ass. Inunnik isumaginninnermi perorsaasunngorniat kalaaliinnarnik ilinniartitsisoqarlutik naammassisut aatsaat taama angusarissaartigipput.

Ullumikkut misilitsittoqarsinnaavoq qinnutigingaanni nammineq oqaatsit atorlugit. Sulili periarfissat annertusarusuppagut soorlu kalaallisuinnaq oqaasillit ilinniaatigalutik oqaatsinik allanik qallunaatut tuluttullu immikkut ilinniartinneqarsinnaanerit periarfissillugu.

Nivi'p isornartorsiuinermini asuli akissaajaatitut tikkuartuivoq siunertamut taassumunnga, uangali isumaqarpunga periarfissiinngikkutta suli akisunerusoq inuimmi tamatta naleqarpugut kalaallisuinnarluunniit oqaaseqaralarutta, sullitassagummi kikkuppat? Amerlanerit kalaallisut oqaaseqartuupput.

Naalakkersuisut oqaatsinut politikkianni kalaallisuinnaq oqaasillit kisimik pineqanngillat. Naalakkersuisummi aamma anguniarpaat nunatsinni najugallit tamarmik kalaallisut oqaluttalernissaannut periusissiorqassasoq.

Taamatut oqariarlunga ersarissaatigissuara, kalaallisuinnaq oqaasillit annerusumik Naalakkersuisuniit periarfissikkusukkatsigit isumaqanngilaq oqaatsit allat mattukkigut. Akerlianik nunani allani ilinniarsinnaanerup ammaanneqarnerulernissaa anguniarlugu suliniuteqarpugut inatsimillu allannguutissamik Ilinniartitaanermut Naalakkersuisutut saqqummiussissamarlunga.

Aamma pilersaarutaavoq meeqqat atuarfianni tuluit oqaasiisa 1. klassimiik atuartitsissutigineqartalernissaat taamaamat eqqortuunngilaq allanut mattulluta kalaallilu oqaasii kisiisa aallaavigalugit suliniartugut. Tassami oqaatsit tungaatigut suliniutigut annertupput qulaanilu taasakka suliniutitta ilaannannguarivaat allat ilanngussuutinngikkalarlugit."

Apeqqutima ullut suliffiit naliginnaasut qulit iluanni akineqarnissaat kissaatigaara.